

太遲不得太速舉箸放箸不在師長前○行食未至不得生煩惱不得大聲呼喚○時常飲食不得失儀○有失儀者不得非笑○飲食畢擊磬聽大眾經行

聽法威儀

凡聽法已精思理致身體力行不得徒資口耳○年少初真戒行未堅道心未篤宜專持本戒不得蚤受中極戒○不得與年少道士俗姓子弟結友○不得與女冠結拜姊妹書疏往來

出行威儀

入法堂行安詳舒徐○人閱經不得在彼案前經行○人禮拜不得在彼頭前經行○入觀宇不得行中央當路或左或右行○隨師行當低頭隨後不得左右顧盼○不得止道傍久共人語○不得馳行○不得掉臂行○不得與少年道俗談笑同行○不得在女人前後互隨行○不得與醉漢狂夫前後互隨行○隨師行若偶分行期會處不得後時○凡遇官府不論大小宜迴避○年少戒行未堅不得遠方遊行必欲參師訪道當擇賢侶不得同不肖匪人同行

起立威儀

立不得偏任一足及倚棹靠壁○侍師不得對面立不得高處立不得遠立立師後不得倚師座○見師長起立見賓客